

SCEURA.

18. SCEURA. *Tetrandria, monogynia, monopetala, infera, monosperma.*

CHARACTER GENERICUS. *Calyx*; perianth. corollæ fere longitudine, urceolatum, imbricatum, rigidum, persistens: laciniis 8 rigidis, convexis, viridibus, tribus infimis brevioribus, rotundis, velut calycem peculiarem constituentibus: 5 interioribus, longioribus, ciliatis. *Corolla* infera monopetala, campanulata, rigida, limbo quadrifido, patente, ovato, tubo latera germinis cingente. *Stamina*; *filamenta* 4, brevia, filiformia, erecta, inserta corollæ sub fissuris limbi. *Antheræ* ad apicis latus interius subrotundæ, compressæ, didymæ, filamentorum longitudine. *Pistillum*: *Germen* ovato-oblongum, villosum; basin tubi corollæ implens. *Stylus* germine angustior, duplo brevior, flavus, lævis, filiformis. *Stigmata* 2, curva, longitudine styli, filiformia, obtusa. *Pericarpium* nullum. Ad basin seminis parva *coronula* ex calyce persistente; supremis 5 laciniis fructui incumbentibus; reliquis 3, calycem formantibus urceolatum. *Semen* unicum, magnum, compressum, ovato-mucronatum, margine convexum, tomentosum: cute carnosio-coriacea; interne cotyledonibus duobus, carnosis, rigidis, versus eundem marginem complicatis, uno extra alterum; punctatis, reniformibus: ad basin plumula cylindrica; basi hirsutie, alba, longa: corculo bifolio, lineari-lanceolato, basi hirsuta.

SPECIES. SCEURA MARINA; *foliis lanceolatis, integris; floribus fulvis.*

DESCR. *Caulis* sæpe arboreus, cortice lævi, olivaceo; interdum frutex altitudine sex ulnarum, crassitie brachii. *Rami* brachiatim oppositi, foliis articulis bipollicaribus, versus apicem brevioribus; teretes, quadrangulares, geniculis crassioribus. *Folia* ad genicula opposita: *petiolo* viridiflavo, utriusque convexo, lateribus marginato: *lamina* lanceolata, integra, acuta, plana, nitida, rigida, viridi. *Pedunculi* terminales, ex ultimis ramorum axillis, tomentosi: articulari. *Flores* sessiles, solitarii, oppositi; bractea lanceolata, flava, calyce longiori. *Corolla* fulva: post florescentiam nigra, decidua. *Fructus* viridi-flavescentes, amygdalo immaturo similis.

Arab. *Schura*. شوره Mascatensibus *Germ* قمر *Proteæ* paucis accedit notis; non vero ad perfectam similitudinem.

Frequens in Insulis & littoribus *Maris rubri*, densa crescit sylva, ut almeta borealis orbis: Fructus non edulis. Lignum in foci usus. Folia pabulum præbent Camelis, asinis, ovibus. Arabes narrarunt, Semen in arbore dehiscere & cotyledones nudos emittere: quod vix credibile mihi videtur.